

21-bob. Byudjet tizimi byudjetlariga o'zgartirishlar kiritish

143-modda. Byudjet tizimi byudjetlariga o'zgartirishlar kiritish tartibi

Moliya yili mobaynida byudjet tizimi byudjetlariga o'zgartirishlar kiritish:

byudjet tizimi byudjetlari daromadlari va (yoki) xarajatlarni kamaytirishni yoki ko'paytirishni nazarda tutuvchi qonun hujjatlari o'zgargan;

bir byudjet tashkiloti va byudjet mablag'lari oluvchi uchun byudjetdan ajratiladigan mablag'lar kamaytirilib, mos ravishda boshqa byudjet tashkiloti va byudjet mablag'lari oluvchi uchun byudjetdan ajratiladigan mablag'lar ko'paytirilgan;

byudjet tashkilotlari va byudjet mablag'lari oluvchilarda byudjetdan ajratiladigan mablag'lar xarajatlarning bir moddasidan boshqa moddasiga o'tkazish zaruriyati yuzaga kelgan;

Davlat byudjeti mablag'larining moliya yili boshidagi erkin qoldiqlari ushbu Kodeksning 126-moddasida nazarda tutilgan tartibda xarajatlarni moliyalashtirishga yo'naltirilgan;

byudjet tasnifiga o'zgartirishlar kiritilgan;

ushbu Kodeks 120-moddasining to'rtinchi qismida nazarda tutilgan hollarda amalga oshiriladi.

Davlat byudjeti daromadlari prognozining oshirib bajarilishi, Qoraqalpog'iston Respublikasining respublika byudjetiga, viloyatlarning viloyat byudjetlariga va Toshkent shahrining shahar byudjetiga davlat aktivlarini xususiylashtirishdan va davlat daromadiga o'tkazilgan mulkni realizasiya qilishdan tushgan mablag'lar hisobidan xarajatlar Davlat byudjetiga o'zgartirishlar kiritilmasdan amalga oshiriladi.

(143-moddaning ikkinchi qismi O'zbekiston Respublikasining 2018 yil 24 dekabrda O'RQ-508-sonli Qonuni tahririda — Qonun hujjatlari ma'lumotlari milliy

bazasi, 25.12.2018 y., 03/18/508/2365-son — 2019 yil 1 yanvardan kuchga kiradi)

Byudjet tizimi byudjetlarini ijro etishda byudjet tizimi byudjetlarining daromadlari va xarajatlariga kiritilgan o'zgartirishlar O'zbekiston Respublikasi Moliya vazirligining axborot tizimida hisobga olinadi.

Moliya yili mobaynida Qoraqalpog'iston Respublikasi byudjeti, viloyatlar va Toshkent shahar mahalliy byudjetlari xarajatlariga ularning tasdiqlangan parametrlari doirasida birinchi va ikkinchi guruh xarajatlari, shuningdek oziq-ovqat mahsulotlari va dori-darmonlar sotib olish xarajatlari bo'yicha byudjetdan ajratiladigan mablag'larni ko'paytirish yoki kamaytirishni nazarda tutuvchi o'zgartirishlar faqat O'zbekiston Respublikasi Moliya vazirligi bilan kelishilgandan keyin amalga oshiriladi.

Davlat byudjeti daromadlari va xarajatlariga tasdiqlangan byudjetlar doirasida uning ijrosi jarayonida qonun hujjatlari asosida o'zgartirishlar kiritish tegishincha O'zbekiston Respublikasi Moliya vazirligi va hududiy moliya organlari tomonidan amalga oshiriladi hamda O'zbekiston Respublikasi Moliya vazirligining axborot tizimida hisobga olib boriladi.

(143-moddaning beshinchi qismi O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)

Qarang: Mazkur Kodeksning 21 — 23-moddalari, II bo'limi (Byudjet tizimi byudjetlari), O'zbekiston Respublikasi Adliya vazirligi tomonidan 22.12.2016 yilda 2850-son bilan ro'yxatdan o'tkazilgan O'zbekiston Respublikasi moliya vazirining 22.11.2016 yildagi 88-sonli buyrug'i bilan tasdiqlangan O'zbekiston Respublikasi byudjet tizimi byudjetlarining g'azna ijrosi qoidalarining 3-bobi.

(144-modda O‘zbekiston Respublikasining 2019 yil 9 dekabrda O‘RQ-590-sonli Qonuniga asosan chiqarib tashlangan — Qonun hujjatlari ma’lumotlari milliy bazasi, 10.12.2019 y., 03/19/590/4129-son)

145-modda. O‘zbekiston Respublikasi respublika byudjetining xarajatlar yoyilmasiga o‘zgartirishlar kiritish tartibi

Birinchi darajali byudjet mablag‘larini taqsimlovchi uchun O‘zbekiston Respublikasi respublika byudjetidan ajratiladigan mablag‘larni boshqa birinchi darajali byudjet mablag‘larini taqsimlovchiga o‘tkazish (bundan ushbu moddaning ikkinchi qismida ko‘rsatilgan hollar mustasno):

10 va undan ortiq foizi miqdorda O‘zbekiston Respublikasi Oliy Majlisining palatalari tomonidan;

10 foizdan kam miqdorda O‘zbekiston Respublikasi Moliya vazirligining taklifi asosida O‘zbekiston Respublikasi Vazirlar Mahkamasi tomonidan amalga oshiriladi.

Davlat byudjeti to‘g‘risidagi Qonunga muvofiq O‘zbekiston Respublikasi Moliya vazirligiga O‘zbekiston Respublikasi respublika byudjetidan ajratiladigan mablag‘lar tarkibida nazarda tutilgan maqsadli mablag‘lar birinchi darajali byudjet mablag‘larini taqsimlovchilar uchun O‘zbekiston Respublikasi respublika byudjetidan ajratiladigan mablag‘larni hamda Qoraqalpog‘iston Respublikasi byudjeti, viloyatlar va Toshkent shahar mahalliy byudjetlariga beriladigan byudjetlararo transfertlarni ko‘paytirish orqali O‘zbekiston Respublikasi Moliya vazirligi tomonidan qayta taqsimlanadi.

Birinchi darajali byudjet mablag‘larini taqsimlovchilar uchun ajratilgan byudjet mablag‘lari doirasida bir ikkinchi darajali byudjet mablag‘larini taqsimlovchi uchun ajratilgan mablag‘larni boshqa ikkinchi darajali byudjet mablag‘larini taqsimlovchiga o‘tkazish:

10 va undan ortiq foiz miqdorda O‘zbekiston Respublikasi Moliya vazirligining taklifiga ko‘ra O‘zbekiston Respublikasi Vazirlar Mahkamasi tomonidan;

10 foizdan kam miqdorda tegishli birinchi darajali byudjet mablag'larini taqsimlovchining taklifiga ko'ra O'zbekiston Respublikasi Moliya vazirligi tomonidan amalga oshiriladi.

Ob'yektlarni loyihalashtirish, qurish (rekonstruksiya qilish) va jihozlash uchun kapital qo'yilmalarni amalga oshirish uchun nazarda tutilgan mablag'larni joriy xarajatlarga yo'naltirish taqiqlanadi.

(145-moddaning matni O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)

Qarang: O'zbekiston Respublikasi Adliya vazirligi tomonidan 15.02.2018 yilda 2971-son bilan ro'yxatdan o'tkazilgan O'zbekiston Respublikasi moliya vazirining 26.12.2017 yildagi 182-son buyrug'i bilan tasdiqlangan Byudjet tashkilotlari va byudjet mablag'lari oluvchilarning davriy moliyaviy hisobotlarini tuzish, tasdiqlash hamda taqdim qilish bo'yicha qoidalarining 84, 99, 109, 116-bandlari.

(146-modda O'zbekiston Respublikasining 2019 yil 9 dekabrda O'RQ-590-sonli Qonuniga asosan chiqarilgan — Qonun hujjatlari ma'lumotlari milliy bazasi, 10.12.2019 y., 03/19/590/4129-son)

147-modda. Qoraqalpog'iston Respublikasi respublika byudjetining, viloyatlar viloyat byudjetlarining va Toshkent shahri shahar byudjetining xarajatlari yoyilmasiga o'zgartirishlar kiritish tartibi

Bir hududiy byudjet mablag'larini taqsimlovchi uchun ajratilgan byudjet mablag'larini boshqa hududiy byudjet mablag'larini taqsimlovchiga o'tkazish ajratiladigan byudjet mablag'larining cheklangan miqdorining:

10 va undan ortiq foiz miqdorda Qoraqalpog‘iston Respublikasi Jo‘qorg‘i Kengesi, xalq deputatlari viloyatlar va Toshkent shahar Kengashlari tomonidan;

10 foizdan kam miqdorda Qoraqalpog‘iston Respublikasi Vazirlar Kengashi, viloyatlar va Toshkent shahar hokimliklari tomonidan amalga oshiriladi, bundan ushbu Kodeks 145-moddasining **ikkinchi qismida** nazarda tutilgan hollar mustasno.

Hududiy byudjet mablag‘larini taqsimlovchi tasarrufidagi bir byudjet tashkiloti va byudjet mablag‘lari oluvchidan boshqa byudjet tashkiloti va byudjet mablag‘lari oluvchi uchun byudjetdan ajratiladigan mablag‘larni o‘tkazish hududiy byudjet mablag‘larini taqsimlovchilar so‘roviga ko‘ra tegishli hududiy moliya organlari tomonidan amalga oshiriladi.

*(147-moddaning matni O‘zbekiston Respublikasining 2019 yil 9 dekabrda O‘RQ-590-sonli **Qonuni** tahririda — Qonun hujjatlari ma’lumotlari milliy bazasi, 10.12.2019 y., 03/19/590/4129-son)*

148-modda. Tumanlar va shaharlar byudjetlarining xarajatlari yoyilmasiga o‘zgartirishlar kiritish tartibi

Bir hududiy byudjet mablag‘larini taqsimlovchi uchun ajratilgan byudjet mablag‘larni boshqa hududiy byudjet mablag‘larini taqsimlovchiga o‘tkazish ajratiladigan byudjet mablag‘larining cheklangan miqdorining:

10 foiz va undan ortiq miqdorda xalq deputatlari tumanlar va shaharlar Kengashlari tomonidan;

10 foizdan kam miqdorda tumanlar va shaharlar hokimliklari tomonidan amalga oshiriladi, bundan ushbu Kodeks 145-moddasining **ikkinchi qismida** nazarda tutilgan hollar mustasno.

Tumanlar va shaharlar byudjetlaridan moliyalashtiriladigan hududiy byudjet mablag‘larini taqsimlovchi tasarrufidagi bir byudjet tashkiloti va byudjet mablag‘lari oluvchidan boshqa byudjet tashkiloti va byudjet mablag‘lari oluvchi uchun byudjetdan ajratiladigan mablag‘larni o‘tkazish hududiy byudjet

mablag'larini taqsimlovchilar so'roviga ko'ra tumanlar va shaharlar hokimliklarining moliya bo'limlari tomonidan amalga oshiriladi.

(148-moddaning matni O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)

149-modda. Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasi xarajatlariga o'zgartirishlar kiritish tartibi

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlariga ularning tasdiqlangan hajmlariga nisbatan 3 foiz va undan ortiq miqdorga ko'paytirishni yoki kamaytirishni nazarda tutadigan o'zgartirishlar kiritish O'zbekiston Respublikasi Vazirlar Mahkamasining taqdimiga ko'ra O'zbekiston Respublikasi Oliy Majlisining palatalari tomonidan amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlariga ularning tasdiqlangan hajmlariga nisbatan 3 foizdan kam miqdorda ko'paytirish yoki kamaytirishni nazarda tutadigan o'zgartirishlar kiritish davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasi taqsimlovchi organlarining taqdimiga ko'ra O'zbekiston Respublikasi Vazirlar Mahkamasi tomonidan amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlarini ularning tasdiqlangan hajmlariga nisbatan ko'paytirish ularni qoplash manbalari mavjud bo'lgan taqdirda amalga oshiriladi.

Davlat maqsadli jamg'armalari hamda O'zbekiston Respublikasi Tiklanish va taraqqiyot jamg'armasining xarajatlariga ularning tasdiqlangan umumiy hajmlarini

ko'paytirmasdan yoki kamaytirmasdan o'zgartirishlar kiritish davlat maqsadli jamg'armalarini hamda O'zbekiston Respublikasi Tiklanish va taraqqiyot jamg'armasining taqsimlovchi organlari tomonidan O'zbekiston Respublikasi Moliya vazirligi bilan kelishuvga ko'ra amalga oshiriladi.

(149-modda O'zbekiston Respublikasining 2019 yil 9 dekabrda O'RQ-590-sonli Qonuni tahririda — Qonun hujjatlari ma'lumotlari milliy bazasi, 10.12.2019 y., 03/19/590/4129-son)

150-modda. Xarajatlar smetasiga va shtat jadvaliga o'zgartirishlar kiritish tartibi

Byudjet tashkilotining yoki byudjet mablag'lari oluvchining so'roviga ko'ra moliya yilida uning uchun nazarda tutilgan xarajatlarning ayrim moddalar bo'yicha byudjetdan ajratiladigan mablag'larning hajmlari xarajatlarning boshqa moddalari bo'yicha byudjetdan ajratiladigan mablag'lar teng miqdorda kamaytirilgan hamda byudjet tashkiloti yoki byudjet mablag'lari oluvchi uchun nazarda tutilgan byudjetdan ajratiladigan mablag'larning tasdiqlangan umumiy hajmi saqlab qolingan holda ko'paytirilishi mumkin. Mazkur o'zgartirishlar byudjet tashkilotlari va byudjet mablag'lari oluvchilar tomonidan xarajatlar smetasiga yiliga ko'pi bilan to'rt marta kiritiladi va:

O'zbekiston Respublikasining respublika byudjetidan moliyalashtiriladigan byudjet tashkilotlari va byudjet mablag'lari oluvchilar bo'yicha — byudjet mablag'larini taqsimlovchi tomonidan;

byudjet mablag'larini taqsimlovchilar bo'yicha — O'zbekiston Respublikasi Moliya vazirligi tomonidan;

Qoraqalpog'iston Respublikasining respublika byudjetidan, viloyatlarning viloyat byudjetlaridan va Toshkent shahrining shahar byudjetidan moliyalashtiriladigan byudjet tashkilotlari va byudjet mablag'lari oluvchilar bo'yicha — Qoraqalpog'iston Respublikasi Moliya vazirligi, viloyatlar va Toshkent shahar hokimliklarining moliya boshqarmalari tomonidan;

tumanlar va shaharlar byudjetlaridan moliyalashtiriladigan byudjet tashkilotlari va byudjet mablagʻlari oluvchilar boʻyicha — tumanlar va shaharlar hokimliklarining moliya boʻlimlari tomonidan;

davlat maqsadli jamgʻarmalari byudjetlaridan moliyalashtiriladigan byudjet mablagʻlari oluvchilar boʻyicha — davlat maqsadli jamgʻarmalarini taqsimlovchi organlar tomonidan roʻyxatdan oʻtkaziladi.

Byudjet tashkilotlarining xarajatlar smetasiga kiritiladigan oʻzgartirishlar soni hisobga olinayotganda byudjet tashkilotlarida ishlovchi ayollarga homiladorlik va tugʻish nafaqasi toʻlash uchun byudjet tashkilotining tasdiqlangan xarajatlar smetasi doirasida byudjetdan ajratiladigan mablagʻlarni bir moddadan boshqa moddaga koʻpaytirishni yoki kamaytirishni nazarda tutuvchi oʻzgartirishlar hisobga olinmaydi.

(150-modda Oʻzbekiston Respublikasining 2015 yil 29 dekabrda OʻRQ-396-sonli Qonuniga asosan ikkinchi qism bilan toʻldirilgan — OʻR QHT, 2015 y., 52-son, 645-modda)

Byudjet tashkilotining va byudjet mablagʻlari oluvchining soʻroviga koʻra kamaytirish tomonga oʻzgartirishlar kiritishga yoʻl qoʻyilmaydigan xarajatlar moddalari Oʻzbekiston Respublikasi Moliya vazirligi tomonidan belgilanadi.

Qonun hujjatlariga muvofiq ish haqi miqdorlari oshirilishi munosabati bilan byudjet tashkilotining shtat jadvaliga kiritiladigan oʻzgartirishlar moliya organi tomonidan roʻyxatdan oʻtkazilmaydi.

Byudjet tashkilotining shtat jadvaliga kiritilgan oʻzgartirishlar Oʻzbekiston Respublikasi Moliya vazirligi tomonidan belgilangan shakl boʻyicha tegishli moliya organida roʻyxatdan oʻtkazilishi lozim, ushbu moddaning **uchinchi qismida** koʻrsatilgan hollar bundan mustasno.